

**Ujaqqanik pinneraasiornermik ingerlatsisut misilittagaannik ilanngussisumik nassuiaammik, inuussutissarsiornermik ingerlatsereersut akornanni, aallartitsisussani kiisalu annikitsumik aatsitassarsiornermik akuersissutinik piginnittut nalilinnik annertunerusumik kaaviiartitsinissamut sulisuminnillu amerlisaanissamut aaqqissuussaanikkut aammalu inatsisitigut kigaallisaatit, uniffiit suunerannik kingusinnerpaamik UKA2019-imi Naalakkersuisut saqqummiussinissaat pillugu Inatsisartunut aalajangiiffigisassatut siunnersuut. Kigaallisaatit, uniffittut suussusersineqartut qanoq ililluni peerneqarnissaannut sapinngisamilluunniit kigaallisaatit, uniffiit annikinnerpaamiitinnissaannut siunnersuummik nassuiaat imaqassaaq.**

(Inatsisartunut ilaasortaq Aqqaluaq B. Egede, Inuit Ataqatigiit)

### **Akissuteqaat**

(Aatsitassanut Suliffeqarnermullu Naalakkersuisoq)

### **Aappassaanneerpeqarnera**

Naalakkersuisut Inuussutissarsiornermut Aatsitassanullu Ataatsimiititaliaq aalajangiiffigisassatut siunnersuummik suliarinninneranut qutsavigaat.

Naalakkersuisut maluginiarpaat, Inuussutissarsiornermut Aatsitassanullu Ataatsimiititaliap isumaqatigiittup siunnersuuttip akuerineqarnissaa inassutigigaat.

Ujaqqanik pinneraasiassanik akuersissummik allagartaliisarneq pillugu nassuiaatip 2017-imeersup suliarineqareernerata kingorna qanoq pisoqarsimanersoq paasissutissiissutigeqqullugu Inuussutissarsiornermut Aatsitassanullu Ataatsimiititaliap isumaliutissiissummini Naalakkersuisut qinnuigai.

Ujaqqanik pinneraasiassanik akuersissummik allagartaliisarneq pillugu nassuiaammi, Naalakkersuisunit 2017-imi juunimi akuerineqartumi, inerniliisoqarpoq soqutigisaqartut ujaqqanik pinneraasiassanik nunatsinneersunik akuersissummik allagartaliisarnermut aaqqissuussinerup periarfissaqarfiunera takusinnaagaat. Soqutigisaqartut isumaqarput ujaqqanik pinneraasiassanik akuersissummik allagartaliineq tunisaqarnerulernermik aammalu tunisinermi akigititat qaffasinnerulernerannik malitseqartussaasoq. Taamaattoq akuersissummik allagartaliiniarnerup ingerlanerata sivilisunaarsinnaanera aarleqqutigineqarsimavoq.

Nassuiaat suli aalajangersimasunik suliniutinik kinguneqanngilaq. Naalakkersuisut Nuummi ulluni 5-6. december 2018 annikitsumik aatsitassarsiorneq pillugu isumaqatigiissitsiniarput. Tassunga atatillugu akuersissummik allagartaliisarnermut aaqqissuussineq qanoq pitsaanerpaamik piviusunngortinneqassanersoq, soqutigisaqartut oqalliseqatigineqassapput.

Matumuuna siunnersuut akuerineqassasoq Naalakkersuisut inassutigaat.